

# Suliffeqarnermi innersuussisarneq il.il. pillugit Inatsisartut peqqussutaat

Suliffissarsiuussisarnermut inunnillu isumaginninnermut Kalaallit Nunaanni inatsimmi nr. 580-imi, ulloq 29. november 1978-imeersumi § 2-p kingunerisaanik, tak. Suliassaqrarfiit Kalaallit-nunaanni hjemmestyreqarnermut nuunneqarnissaannik inatsisit ilaasa atortuulersinneqarnerannik Kalaallit-nunaannut ministeqarfiup nalunaarutaa nr. 417, 27. september 1979-imeersoq, aalajangersarneqarput:

## *Nassuiaatit atuuffilu*

**§ 1.** Suliffeqarnermi innersuussisarneq paasineqassaaq suliffeqarnermi ineriartorneq siuarsarniarlugu nuna tamakkerlugu, illuinnaasiunngitsumik akeqanngitsumillu sullissinertut, taamatuttaaq sulisartut suliamut tunngatillugu nukittorsarneqarnissaat nunamilu nuttarsinnaanerit ilanngullugit.

*Imm. 2.* Suliffissamik innersuussisarneq paasineqassaaq suliffissarsiortup sulisitsisullu akornanni suliffeqarnermi pissutsit aalajangersimasut pilersinneqarnissaat siunertarlugu attaveqaqatigiissitsinertut.

*Imm. 3.* Suliffeqarnermi innersuussisarfiup suliassaraa inuussutissarsiutinit atorfinnillu assigiinngitsunit tamanit suliffissarsiortunut suliffissanik innersuussisarneq aamma sulisitsisinut sulisussanik innersuussisarneq. Taamatuttaaq suliffeqarnermi innersuussisarfiup ilinniagaqarnermut tunngasuni qinnuteqartunik siunnersuineq allaffissornikkullu aqutsineq suliassarai.

*Imm. 4.* Peqqussut sulinermit Kalaallit Nunaanni sularineqartumut atuuppoq, tassunga ilanngullugit suliffissarsiortut Kalaallit Nunaanni suliffissarsiortut killilersimaarneqarnissaat pillugu Inatsisartut inatsisaat naapertorlugu nunatsinni sulisartutut isigineqartut.

## *Kommunalbestyrelsip suliassai*

**§ 2.** Kommunalbestyrelsip suleqataalluni suliffeqarnermut tunngasutigut ingerlatsinerminnut ilanngullugu

- 1) Kommunimi suliffeqarnermi ineriartorneq malinnaavigissavaa,
- 2) Kommunimi iliuusissanik inuussutissarsiorterup ineriartortinneqarneranut suliffissaqartitsinermullu pingaarutilinnik aallartitsisarnissamut tunngavissat pilersissavai suliniutigisassallugillu, kiisalu
- 3) Kommunimi suliffeqarneq pillugu paasissutissat katersussavai nalilersorlugillu, paasissutissallu tamakku Naalakkersuisunut nalunaarutigisassallugit.

*Imm. 2.* Imm. 1, nr. 3 naapertorlugu Naalakkersuisut nalunaarutiginnittarneq pillugu erseqqinnerusunik malittarisassanik aalajangersaasinnaapput.

**§ 3.** Kommunalbestyrelsi pisussaavoq kommunimi suliffeqarnermi innersuussisarfissaqartitsissalluni, taamatuttaaq suliffissanik innersuussisarnermik aamma ilinniartitaanernut inuussutissarsiutinullu ilitersuuisarnernik aqqissuussissalluni, §§ 5 B 9 takukkit.

*Imm. 2.* Kommunalbestyrelsip kommunimi suliffissaqartitsineq pillugu kisitsisitigut paasissutissat Naalakkersuisunut nalunaarutigisassavai.

*Imm. 3.* Naalakkersuisut kommunalbestyrelsip kisitsisitigut paasissutissanik il.il. nalunaaruteqartarnera pillugu malittarisassanik aalajangersaasinnaapput.

**§ 4.** Kommunalbestyrelsip sulissutigissavaa kommunimi suliffeqarnermi illuatungeriit pisortallu ingerlatsiviisa akornanni tatigeqatigiiffiusumik qanittumillu suleqatigiinnermik pilersitsisoqarnissaa, taamaalilluni sulisartut ineriartortinneqarnerannut suliniuteqarnissamut tunngavissaqalissammat, siunissami qaninnermi ungasinnerusumilu inuussutissarsiortut pisariaqartitaannut kommunimilu inuussutissarsiutit ineriartortinneqarnerannut periarfissanut tulluussakkanik.

*Imm. 2.* Kommunalbestyrelsi kommunimi sulisartut piginnaasaasa nukittorsarneqarnissaannut suliffissaqartitsinermut tunngatillugu iliuusissanik aallartitsinissamut siunnersuusiussaaq.

*Imm. 3.* Kommunalbestyrelsi suliffissaqartitsinermut tunngatillugu aamma/ imaluunniit ilinniartitaanermut tunngatillugu immikkut neqeroorutinik inuusuttunut 25-t ataallugit ukiulinnut sammisitanik aallartitsissaaq.

*Imm. 4.* Naalakkersuisut suliffissaqartitsinermut tunngatillugu iliuusissat pillugit maleruagassannik aalajangersaasinnaapput.

*Inuussutissarsiutinut ilinniartitaanernullu ilitersuisarneq kiisalu suliffissanik innersuussisarneq*

**§ 5.** Kommunalbestyrelsi suliffissarsiortunut inunnulu piginnaangorsaanerup ingerlaneranut imaluunniit inuusuttut kiffartuussinerannut peqataasunut ataasiakkaanut iliuusissanut pilersaarusiussaaq.

*Imm. 2.* Inuussutissarsiutinut ilinniartitaanernullu ilitersuinerup ilaapput inuussutissarsiummik ilinniartitaanermillu toqqaaniarnermi ikiorsiinerit.

*Imm. 3.* Kommunalbestyrelsi Inatsisartut peqqussutaat manna malillugu kommunalbestyrelsip suliassaasa allaffissornikkut aquneqarnerannut ilitersuisarfimmik suliffeqalernissamullu piareersarfimmik pilersitsisinnaavoq.

*Imm. 4.* Kommunalbestyrelsi inuussutissarsiutinut ilinniartitaanernullu ilitersuinerup kiisalu suliffissanut innersuussisarnerup inernera pillugu Naalakkersuisunut nalunaaruteqarnissamut pisissaafeqarpoq.

*Imm. 5.* Naalakkersuisut pissutsit imm. 2-4-mi taaneqartut piviusunngortinneqarnissaannut malittarisassanik aalajangersaasinnaapput, taamatuttaaq qitiusumik ilitersuisarfiit suliffeqalernissamullu piareersarfiit pilersinneqarnerannut ingerlanneqarnerannullu tapiissuteqartarneq pillugu malittarisassaliorsinnaallutik.

**§ 6.** Suliffissamik innersuussisoqartinnagu akissarsiat aamma sulinerup atorfinitsitaanermilu atugassarititaasut allat pillugit paasissutissat pissarsiarineqassapput.

**§ 7.** Suliffissamik innersuussineq najukkamiit allamut nuunnermik kingunilik pissappat piumasaqaataavoq,

1) nuunneq suliffeqarnermi najukkami suliamullu tunngatillugu pisariaqartitanik naliliineq aallaavigalugu kissaatigineqartutut isigineqassasoq,

2) suliffissarsiortoq akuersisimassasoq,

3) innersuunneqartoq angallanneqarnermut pisattanillu nuussinermut aningaasartuutissinneqassanngitsoq, aamma

4) innersuunneqartoq inissaqartinneqassasoq.

*Imm. 2.* Naalakkersuisut aningaasartuutit imm. 1, nr. 3-mi taaneqartut matussutissaannut

tapiissuteqarsinnaapput. Naalakkersuisut tamakku pillugit malittarisassanik erseqqinnerusunik aalajangersaasinnaapput.

**§ 8.** Sulisussanik sulisitsisumut imaluunniit suliffeqarfimmut innersuussisoqarsinnaangilaq sulisartut kattuffiannit soqutigisaqaqatigiiffimmilluunnit allamit uppernarsaatit sukumiisut malillugit sulisartut suliumajunnaarneranni imaluunniit sulisitsisut mattussineranni eqqugaasumut, tamanna isumaqatigiissutitut akerliusutut nalilernerqarsimanngippat.

**§ 9.** Atorfimmut inuttaqanngitsumut sulisussamik naleqquttumik innersuussisoqarsinnaagaangat tamanna pillugu kommunalbestyrelsi sulisitsisumut nalunaaruteqartassaaq.

*Imm. 2.* Sulilernissaagaluaq piviusunngunngitsoorpat sulilernerluunniit aallartikkaluaannaq taamaatitinneqarpat sulisitsisoq pisussaavoq tamanna pillugu kommunalbestyrelsimut piaartumik nalunaaruteqassalluni taamatullu tamatumunnga pissutaasoq nalunaarutigissallugu.

*Imm. 3.* Sulisitsisoq sulisussanik innersuunneqartunik itigartitsisoq angallanneqarnermut pisattallu nuunnerinut aningaasartuutigineqarsimasunik utertitsilluni akiliisussaatitaavoq, sulisussanik allanik sulilersitsineq itigartitsinermut pissutaasimappat sulisitsisorlu kommunalbestyrelsimut piffissaagallartillugu suliffigiligassamut angalanerup pinngitsoortinneqarsinnaasimagaluarneranik ilisimatitsissuteqarsimanngippat.

#### *Aalajangersakkat assigiinngitsut*

**§ 10.** Naalakkersuisut nuna tamakkerlugu suliffissanik nalunaarsuivimmik pilersitsisinnaapput, suliffissanik neqeroorutit, suliffissaaleqineramik allaffissornikkut aqutsinerup aammalu kisitsisitigut paasissutissiornissat nalilersuillunilu misissueqqissaarnissat siunertaralugit tunngaviusumik paasissutissat katersorneqarfigisinnaasaannik suliareqqinneqarfigisinnaasaannillu.

*Imm. 2.* Naalakkersuisut imm. 1 malillugu suliffissanik nalunaarsuiffup pilersinneqarnissaa pillugu malittarisassanik aalajangersaasinnaapput, taamatuttaaq suliffissanik nalunaarsuiffup atornissaanut kommunalbestyrelsip pisussaaffi pillugit malittarisassaliorsinnaallutik.

**§ 11.** Naalakkersuisut kommunini sulisunik suliffeqarnermi innersuussisarnermik il.il. suliqaqtunik ukiumoortumik pikkorissartitsisassapput.

*Imm. 2.* Naalakkersuisut kommunalbestyrelsinut qinersisoqareernerani tamatigut kommunalbestyrelsimut ilaasortanut peqqussummi matumani pineqartunik suliassaqaqtitaasunut pikkorissartitsisassapput.

*Imm. 3.* Imm. 1 aamma 2 naapertorlugit pikkorissartitsineranut aningaasartuutit Nunatta Karsianit kommuninillu akilernerqartassapput.

**§ 12.** Naalakkersuisut suliassaqaqtitsineramik siuarsaaniarluni iliuutsinut aamma inuusuttut kiffartuussinerinut tapiissuteqarsinnaapput, takukkit § 4-imi imm. 2 aamma 3. Tapiissutit annertussusissaat ukiumoortumik aningaasanut inatsisini aalajangersarneqartassapput.

*Imm. 2.* Naalakkersuisut tapiissutit agguanneqartarnerinut akiliutigineqartarnerinullu maleruagassanik aalajangersaasinnaapput.

**§ 13.** Naalakkersuisut suliffissaaleqinerup akiorneqarnissaa kiisalu suliffeqarnermi innersuussisarnerup pisariillisaavigineqarnissaa ineriartortinneqarnissaalu siunertaralugit misileraanerit pillugit malittarisassanik aalajangersaasinnaapput.

**§ 14.** Naalakkersuisut ukiumi qaangiuttumi suliffeqarnermi suliniutaasut aamma piffissami aggersumi anguniagaasut taamatuttaaq malitseqartitsinissat aallartinneqassanersut pillugit ukiumoortumik nalunaarusiortassapput.

*Naammagittaalliuteqartarneq*

**§ 15.** Kommunalbestyrelsen aalajangiinerinik naammagittaalliutit sapaatit akunneri sisamat qaangiutsinnagit Naalakkersuisunut suliaassanngortinneqarsinnaapput.

*Atuutilerfia*

**§ 16.** Inatsisartut peqqussutaat manna ulloq 1. januar 2004-mi atuutilissaaq. Tamatumunnga peqatigitillugu Suliffissarsiuussisarneq pillugu Inatsisartut peqqussutaat nr. 11, 16. december 1988-imeersoq atorunnaarsinneqassaaq.

*Imm. 2.* Kalaallit Nunaanni ilinniarnermut inuutissarsiutinillu ilitersuineq pillugu Namminersornerullutik Oqartussat nalunaarutaat nr. 5 3. september 1982-imeersoq ingerlaannassaaq Inatsisartut peqqussutaata matuma malitsigisaanik allanngortinneqarnissami atuukkunnaarsinneqarnissamiluunniit tungaanut.

*Imm. 3.* Malittarisassat suliffissarsiuussisarneq pillugu Inatsisartut peqqussutaat nr. 11, 16. december 1988-imeersup malitsigisaanik aalajangersarneqartut ingerlaannassapput, Inatsisartut peqqussutaata matuma malitsigisaanik allanngortinneqarnissanik atuukkunnaarsinneqarnissamiluunniit tungaanut.

*Namminersornerullutik Oqartussat, ulloq 18. december 2003*

Hans Enoksen

/

Johan Lund Olsen

**Namminersorlulik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlulik Oqartussat inatsisinut toqqorsiviat

Naalakkersuisut

